

Motivasi diri penduduk Selangor perlu diperhebat hadapi wabak Covid-19

SHAH ALAM - Selangor merekodkan taburan kes positif koronavirus (Covid-19) tertinggi di negara ini sebanyak 863 kes sehingga jam 12 tengah hari semalam.

Daripada jumlah tersebut, 35 peratus kes iaitu sebanyak 300 kes dicatatkan di Hulu Langat yang kini diklasifikasi sebagai zon merah.

Tiga lagi daerah iaitu Petaling Jaya, Klang dan Gombak turut diletakkan di bawah zon yang sama.

Kawasan Batu 21 hingga Batu 24 Sungai Lui, Hulu Langat telah dikenakan Perintah Kawalan Pergerakan Diperketatkan (PKPD) bermula tengah malam 30 Mac lalu.

Pelaksanaan PKPD itu dilakukan selepas kawasan tersebut mencatatkan 71 kes positif jangkitan Covid-19 daripada 274 penghuni Maahad Tahfiz An-Nabawiyah di Hulu Langat.

PKPD terbabit melibatkan 3,918 penduduk merangkumi 700 rumah di tujuh kampung iaitu dua perkampungan orang asli dan lima perkampungan Melayu.

Menurut Ketua Pengarah



Anggota Bomba dan Penyelamat melakukan kerja-kerja semburan sanitasi di kawasan yang terletak kira-kira dua kilometer dari kawasan yang dikenakan PKPD di Batu 21 Kampung Sungai Lui, Hulu Langat pada 31 Mac lalu.

Kesihatan, Datuk Dr Noor Hisham Abdullah, jangkitan yang berlaku di Hulu Langat mempunyai kaitan dengan kluster tabligh apabila ada di antara pelajar sekolah tahfiz dan madrasah telah menghadiri perhimpunan tabligh di Masjid Jamek Sri Petaling, Kuala Lumpur.

Perkara sama dikongsi Pakar Kesihatan Awam (Epidemiologi/Biostatistik) daripada Universiti Putra Malaysia (UPM),

Profesor Madya Dr Malina Osman yang mengakui kluster tabligh menyumbang kepada peningkatan kes positif Covid-19 di Selangor.

“Saya lihat tiada koordinasi antara kerajaan Persekutuan dan negeri berhubung penyertaan mana-mana pihak dalam aktiviti berkumpulan.

“Pertubuhan Kesihatan Dunia (WHO) sudahpun mengisyiharkan Covid-19 sebagai ke-

cemasan kesihatan global pada 31 Januari lalu selepas meraugut 170 nyawa ketika itu.

“Namun, pihak berkuasa seakan-akan terlepas pandang atau tidak peka apabila perhimpunan tabligh itu terus berlangsung dengan kehadiran ramai peserta dari luar negara,” katanya kepada *Sinar Harian* di sini semalam.

Beliau berkata, kes daripada kluster berkenaan kemudian menular ke beberapa tempat di Selangor.

Bagaimanapun, menurutnya, tindakan kerajaan melaksanakan Perintah Kawalan Pergerakan (PKP) berjaya mengelak peningkatan kes mendadak di Selangor.

“Selangor mempunyai bilangan penduduk yang ramai dengan aktiviti ekonomi dan sosial lebih tinggi berbanding negeri lain.

“Dari segi ekonomi, ia sudah pasti memberi kesan ekoran pelaksanaan PKP. Maka usaha meningkatkan motivasi



DR MALINA

diri kepada penduduk Selangor perlu diperhebatkan,” katanya.

Berdasarkan statistik Jabatan Perangkaan Malaysia pada 2019, penduduk negara ini dianggarkan berjumlah 32.6 juta orang dengan Selangor mewakili 20 peratus sebagai negeri paling ramai komposisi penduduk iaitu kira-kira 6.52 juta orang.

Pada 2018, Selangor menyumbang 23.7 peratus kepada Keluaran Dalam Negara Kasar (KDNK) Malaysia sekali gus mengekalkan statusnya sebagai penyumbang pelaburan tertinggi di negara ini.

Selangor pada 12 Mac lalu menubuahkan pasukan khas dikenali sebagai Task Force Covid-19 yang dipengerusikan bekas Menteri Kesihatan, Datuk Seri Dr Dzulkefly Ahmad.

Dua Pakej Rangsangan Ekonomi Selangor Prihatin memperuntukkan sebanyak RM400.28 juta termasuk insentif keperluan perubatan dalam menangani impak Covid-19 di negeri itu.